

Date – 12/06/2025

Time - 7:30 -7:40Hrs

AKASHVANI AIZAWL
REGIONAL NEWS BULLETIN
HEADLINES (MORNING)

- Crop Insurance Scheme – Pradhan Mantri Fasal Bima Yojana (PMFBY) hnuaiah loneitute sum pek tur engemawzat tum sak sorkarin a rel.
- Siaha leh Lawngtlai inkar ah Tisopi lei chu ECM Kohhran Tipi ferry hmalaknain tunkar tir atang khan dawh tan a ni .
- Union Cabinet chuan Railway Ministry hnuaia project pahnih cheng vaibelchhe sang 6 leh 405 hu a pawm.
- Ramchhunga inhlawhfa leh sawrkar hnathawk ni loten damlohna leh thildanga tuamhlawmna social security coverage chu kum 11 chhungin nasa takin a pung .

<><><>

CROP INSURANCE SCHEME

Hriat lawkloh harsatna laka thlai thar te veng tura hmalakna Crop Insurance Scheme – Pradhan Mantri Fasal Bima Yojana (PMFBY) for 2025–26 chu Chief Minister Pu Lalduhoma kaihhruaiin nimin khan thlirho a ni a.

Agriculture Minister Pu PC Vanlalruata, Agriculture official leh Finance Department aiawhte meetingah hian an kal a ni,

He scheme hian leilung chhiatna hrang hrangn tuilian, khawkheng, leimin, ramkang, rial, tek leh ramsa in a suasam sak lakah te bakah ranning in a eichhiat sak avanga sum loh tur laka invenna tur a keng a, kuminah hian state sorkar chuan Agriculture Insurance Company of India nen thawkdunin he insurance hi an kalpui dawn a ni.

He insurance kalphungah hian central share, state share leh loneitute tum ve tur te a awm a. Loneituten an pek ve tur chhawk zangkhai dan an rel nghal a. Mizoram sawrkar chuan loneitute premium pek ve tur hi thahnem tak tumsak ni se an ti a, he Scheme 2025-26 hi puan theiha peih thuai a ni ang.

<><><>

Furpui thlai chin hun (Kharif season) lo thleng tur atana inbuatsaih nana kut hna thawktute an khuaa kal chilh beihpui thlakna, Viksit Krishi Sankalp Abhiyan (VKSA) chu Lunglei District chhungah kalpui chhunzawm a ni a. Agriculture, Horticulture, AH & Veterinary, Krishi Vigyan Kendra (KVK), Soil, Sericulture leh Fisheries official-te chu team thumah insiamin khua/veng pakuaah an feh chhuak leh a ni.

VKSA team te hian Silgur, Bulongsuri, Tipperaghat, Tawipui North-I, Thualthu, Ramthar, Rangte, Sazaikawn leh Rahsiveng te tlawhin, kut hna thawktu mi 1,158 te nen hun an hmang ho va. Thlai chin, ran vulh, sangha leh pangang khawi leh kut hna thawh kaihhnawiha hriat tur pawimawh hrang hrangte, thlai chi tha leh tun lai thiamna hman tangkai dan te, thlai leh ran natna enkawl dan te, lei enkawl dan leh lei tha hman dan te zirtirin, sawrkarin kut hna thawktute tana hamthatna a duan hrang hrangte an hrihfiah a. Zawhna leh chhanna leh sawi hona hun hlawk tak hman ho a ni bawk.

Lawngtlai District-ah pawh VKSA Campaign hi ngawrh taka kalpui chhunzawm zel a ni a.

Agriculture leh a kaihhnawih Department (Agriculture, Horticulture, AH & Veterinary, KVK, ATMA) ten fehchhuah runpui hi an nei a. VKSA Campaign- ah hian kuthnathawktu ten hlawk zawka thlai, ran vulh leh sangha khawi lama hma an lak theihna turin thingtlang khaw hrang hrangah Central leh State hmalakna (Schemes) leh tun lai thiamna in zirtirna leh puanzarna neiin Department- te an fehchhuak mek a ni.

Ni 29 atanga khan tanin, vawiin thlengin VKSA Campaign- hi kalpui tura ruahman niin; tun dinhmunah Lawngtlai district- a khaw - 61 a Lo neitu mi- 6441 hnenah Campaign hi nei tawh a ni. VKSA Campaign tur hian Department hrang hrangte hi Team thum (3) ah in thenin an fehchhuak thin a. Loneitu ten tha taka lo dawngsawngin inkawmkhawmna hun tha tak hmang thinin, an khaw tana hmasawmna tur kawng hrang hrangte an lo thlen thin a ni. VKSA Campaign- hi la kalpui zel tur niin, khaw kal pawh theihna awm ang angah fehchhuah hi la neih chhunzawm zel tura ruahman a ni bawk.

(PTCs)

<><><>

11 YRS MODI GOVT

Kum 11 chhunga BJP sorkarin ram tana rawngbawlna, rorelna tha leh miretheite hamthatna a thawh tawh hrang hrang phochhuahna- Exhibition chu nimin khan BJP National Secretary leh Spokeperson Anil Antony an Aizawl Upper Republic a Mizoram BJP office Hall-ah a hawng.

Exhibition hawnna inkhawm tawiah thusawiin, Pu Anil Antony chuan Prime Minister Narendra Modi-a kaihhruai NDA sorkar chuan kumin May thla khan a kum 11 chhung sorkarna a zo fel a, kum 11 liamta chhung khan ram chhungah inthlak danglamna nasa tak a thleng a ti a. He Exhibition -ah hian kum 11 liamta chhunga ram chhung hmun hrang hranga hmasawmna leh inthlak danglamna thleng te phochhuah a ni a, Prime Minister Narendra Modi-a kaihhruai sorkar hnuaiah hmasawn hnathawh hrang hrang thawh mek a ni a, hmarchhak bialah pawh thawh

mek niin, Mizoramah chuan cheng vbc sang 8, 400 chuang sengin rel kawng kilomtre 52 a sei siam a ni a ti a. Prime Minister Pu Narendra Modi kaihhruaina a hmalakna tarlanna Exhibition buatsaih hi India ram chanchin, hmasawnna kawng a zawh dan hrang hrang te hriat fiah theihna a nih avangin Mizo mipui te chu tlawh turin a sawm a ni.

Exhibition hi tun thla chhungin nitin chawhma dar 9 leh a chanve atanga tlai dar 4 thleng tlawh theih a hawn a ni a. BJP Mizoram State President Pu Vanlalhmuaka pawhin Exhibition ah hian Prime Minister Pu Narendra Modi kaihhruai Kum 11 chhunga hnathawh an tarlan te chu tlawh theuh turin Mizo mipui te a sawm a ni.

<><><>

COOPERATION

Cooperation Department changtu Minister Pu PC Vanlalruata'n Mizoram Sorkar tharin a ngaih pawimawh em em Bana Kaih policy hnuaiah MIZOFED hnuaia Primary Society 350 dawnte din chhuah tir dan tur ngaihtuah tha a tih thu a sawi.

Nimina Synod Conference Hall-a MIZOFED Annual General Assembly vawi 27-na a hmanpuinaah thusawiin Minister chuan, Sorkarin Cooperative Movement a ngaihpawimawh chhan chu mipuiten an thawhhona atanga thawhchhuah an neih te leh chumi avanga hmasawnna tlo leh tluantling, sustainable development hrang hrangah ram in a hlawkpui thin vang a ni a ti a, UNO-in kumin hi Year of International Cooperative-ah a puan angin Cooperative hmangin Mizoramah pawh Mizoram tha zawk siam an tum ti a. Mizoram Sorkar tharin a ngaih pawimawh em em chu bana kaih policy a ni a, chu mi hnuaiah chuan bana kaih ngaite bana kaih an tum tih a sawi a, MIZOFED hnuaia Primary Society 350 dawnte chu bana kaih an ngai em tih ngaihtuah a, engtin nge an din chhuah tir ang tih chu ngaihtuah ho turin a chah a ni.

Minister chuan, Sorkarin thlai thar a leite kaltlangin society-te nena thawh ho dan an ruahman a, kuminah enchhinin, a kum thumnaah chuan society tha tak tak khaw tam takah a pian theih an beisei a ti a, chu chuan Mizoramah hmasawnna thar a pek ngei an ring tih sawiin, Mizote chu Kohhranah thawkho thiam tak ni mah se, Society angin an thawkho thiam tawk lo nia a ngaih thu a sawi a, thangthar zawkte, lehkhathiam zawk te, society-ah Cooperative Movement-a an hnuh luh chhoh zel chuan kalphung fel tak hnuaiah thawhhona tha tak awmin, Mizoramah Cooperative movement-in hma a sawn ngei a beisei thu a sawi a ni.

Tun dinhmunah MIZOFED hian Mizoram hmun hrang hrangah Petrol Pump 10 neiin, tanker 46-in an chawm a, kum 2024-25 chhung khan tuialhthei an hralhna atangin cheng Vbch. 7, nuai 56, sing 5, sang 8 leh 779 an hlep a, District 6-ah LPG Distributor neiin, sorkar kum liam taah khan cheng Vbch. 3, nuai 24, sing 3, sang 5 leh 989 an hlep bawk.

<><><>

Siaha district Siaha leh Lawngtlai inkar ah Tisopi lei chu ECM Kohhran Tipi ferry hmalakna tunkar tir atang khan dawh tan a ni a. He lei hi Abikin Amôtlah tlangdung khaw 4 -Tipi Ferry, Riasika, Amotlah leh Thiahra khua ten khawpui lama chak an lakna kalkawng a ni.

Kan corr sawi danin, he lai tlangdung khaw 4 hi Chhimtuipui lui leh Tisopi lui in a karcheh a, fur tui lian laiin Lei a awm loh avangin ei leh in lakna kawngah an buai hle thin a. Kum 2023 khan Bailey bridge dawhna tur an bialtu MDC Pu HC Lalmalsawma Zasai hmalakna in dawh tan a ni a. Thir dah tur hian contractor hran a ngaih avangin tender hran chhuah a ni a, kumin 2025 thal chhunga dawh zawh hman an beisei laiin contractor te hian hna an tan thei ta lova, lei awm chhun seasonal bridge chu tuilian in a lak tak avangin inkalpawhna a awm ta lo a ni.

ECM Tualchhung kohhran Tipi ferry chuan Kohhran sum atanga dawh turin hma an la a, He thu an hriat hian bialtu MDC leh District Administration (DM&R) lam te hmalakna in cheng nuai 1 chu sanctioned a ni a, lei hi cheng nuai 2 atanga nuai 3 vel seng turah a in ngai a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



UNION CABINET

Union Cabinet chuan Railway Ministry hnuaia project pahnih cheng vaibelchhe sang 6 leh 405 hu a pawm. Heng project te Jharkhand-a Koderma-Barkakana Doubling leh Karnataka-a Ballari- Chikjajur Douling rel line te an ni a. Union Information and Broadcasting Minister Ashwini Vaishnaw chuan Koderma-Barkaka Doubling project hi km 133-a thui tur niin thinglang khua 938-a cheng mi nuai 15 tan inkalpawhna a tihchangtlun phah dawn a ti a. Jharkhand-a district pali-Koderma, Chatra, Hazaribagh leh Ramgarh te a tan tlang dawn a ni.

Pu Vaishnaw sawidanin Ballary-Chikjajur project hi km 185-a thui niin Mangalore port atanga Secunderabad inkar a ni a. He project hian Karnataka-a Ballari leh Chitradurga district leh Andhra Pradesh-a Anantapur district te a pawh dawn a ni.



NDA@11 YEARS SOCIAL SECURITY

Ramchhunga inhlawhfa leh sawrkar hnathawk ni loten damlohna leh thildanga tuamhlawmna social security coverage chu kum 11 chhungin nasa takin a pung. International Labour Organisation zirchianna thar berah chuan kum 2015 ah zaa 19 anih laiin 2025 ah chuan zaa 64.3 a tling tawh a. Kum 10 kalta chhungin zaa 45 laiin a pung a ni.

ILO chuan India hlawhtlinna hi hriatpuiin mipui vaibelchhe 94 te chu social security pakhat talin a tuam niin a chhuah a. Khavel huap pawhin hetiang hamthatna pe tha ram pahnihna a ni pha a ni.

<><><>

NDA @11 YEARS NE

Prime Minister Narendra Modia chuan NDA kum 11 sawrkar chhungin hmasawnna ruhrel nasa takin a thang tih a sawi. Social Media-ah he thu hi tarlangin Pu Modia chuan relkawng, kawngpui, lawngchawlhna leh airport lamahte nasa takin hmasawnna a thleng a ti.

Kum 11 chhung hian ramchhung inkalpawhna lama hmasawnna ruhrel tam tak din thar a nia . Kawngpuite chak taka siam niin chawhrualin nikhatah km 34 zel siam zo anga chhut a ni a. Inkalpawhnate hian thingtlang khua zaa 99 a thleng phak tawh a. Pradhan Mantri Gram Sadak Yojana hnuaiah kum 2014 atang khan inkalpawhna kawngpui km nuai 7.8 chuanga thui siam a ni tawh a. PM Gatishakti National Master Plan hmangin Ministry 44 leh State leh UT 36 te chu GIS hmangin hmasawnna ruhrel dinna kawngah khaikhawm vek an ni tawh bawk.

Aviation lamah pawh hmasawnna tam tak thlengin airport 88 chu Ude Desh Ka Aam Nagrik (UDAN) scheme hmanga siam a ni tawh bawk a ni.

Railways lamah pawh hmasawnna thlengin relkawng sing 4 leh sang 5 chuang chu electric hmanga tlan tir a ni a, Vande Bharat Express rel 68 tlan tir a ni tawh a. Amrit Bharat Station Scheme hnuaiah rel Station 1300 chuang tihchangtlun tawh a ni bawk.

<><><>